



Eng den mezüngbuba ODI nung Bumrah alizüng tasen ka tongtetogo

Trump-i Iran mokdangtsü tuyur, Tehran-ia amokmerener

VOL. XXIII ISSUE NO. 273 (ADOK 273) DIMAPUR YANGTEPNÜ (THURSDAY) CHITENI (JULY) 16, 2026

₹ 5.00

NEC-i Nagaland nem Rs 58.96 crore agütsü

Dimapur, July 15, 2026 (TYO): North Eastern Council (NEC)-i May-June 2026 nung Nagaland nem Rs 58.96 crore lemozütsüogo. Iba nungi NESIDS (Roads) kübok Rs 48.02 crore lemozütsü aser tanüngbaji Scheme of NEC (SoNEC) kübok lemozütsüogo.

NESIDS (Roads) kübok Nagaland nung gari lenmang mapatong tenet atema Rs 48.02 crore lemozütsü.

Mapatongtem: (1.) Upgradation of Road from Thizema via Kohima By-Pass Road to proposed Chiethu Airport via Nehre Model Village; (2.) Improvement of Road from Phomching Hq. (Nagaland) to Longding Hq. (Arunachal Pradesh) via Wetting Longjang & Phuka Village; (3.) Improvement of Road from Coco Road Anglomi Old British Bungalow to Ghukiye Junction via Kilki Road; (4.) Construction of Road from Old Peren to New Peren (DC office) Via Chalkot Junction; (5.) Construction of Road from Jalukie to New DO Complex Model Township at Peren; (6.) Upgradation of Road from Tuensang to Longleng; (7.) Upgradation of Road from Khonoma Village to NH-29 via Tzudza River.

Item lenmangtem ajanga state tem, district tem aser airport tsüingda senzusenbong tajungba akümtsü atema lir. Meta talang pilar aliba yimtsüngtem sendakteptsü, rongsenketzüng ajungkettsü aser nübertemi essential services tajungba angutsü mechi nung gari lenmangtem yanglur.

NEC-i SoNEC ajanga community aser skill development projects balala atema senotsü lemozütsüogo. Mapatongtem rongnung Dimapur nung Skill Development Centre-cum-Garo Community Centre ka aser Jalukie nung Rongmei Multi-Purpose Complex yanglutsü dena lir. Maneni Chumukedima nung Tribal Artisans Resource Centre ka yanglutsü atema sen lemozütsüogo.

NEC-i Mon district kübok Phomching Assembly Constituency nung Integrated Development Project ka atema mezüngbuba instalment agütsüogo. Iba mapatong ya Rs 6.26 crore endoka yanglutsü.

NEC-i May-June nung senotsü agütsüba nung tourism, coffee processing, trade facilities, technical education, aser public amenities yanglutsüba dena lir.

May-June nung Phek district nung 9.60 km Glory Peak Tourist Road renemogo. Iba mapatong ya Rs 32.50 crore endoka yangluogo aser iba lenmang ajanga Glory Peak, Kapamodzu Forest, o Japan Cave leni oteter.

May-June, 2026 nungsa NEC-i universities, technical institutes, NGOs, Societies dena regional agencies nem Rs 18.93 Crore agütsüogo.

Iba nung Nagaland-i sen teimtiba lemozük kechiyong sentong aika ayonga agi.

Item maparen ajanga NEC-i Nagaland nung connectivity, tourism, education, tribal welfare, aser food processing ajungkettsü atema asalentong yanglur mapa inyakba sayur.

NSF, GPRN/NSCN (U) & WC, NNPGs-i aitsür

Dimapur, July 15, 2026 (TYO): Naga Students' Federation (NSF), GPRN/NSCN (Unification) aser WC, NNPGs-i sangdong balala ajanga July 13, 2026 nü Chümoukedima kübok Khopanalla nung IED pokdaksüba aija metetdaksüogo.

Parnok ajaki tasür kibong den asükhu lemsatepba den yirua alirtem tekaraba nung taneptsü angutsü moatsüogo.

Naga lima nung küm aika meranga arur yimjung aser tensa tesüngjem aliba raksatsütsü atema iba mapa inyakba ama ajiteter. Kija ajangzütsü bilemertem aser tangalen alirtei Naga lima nung ozüng alema inyaksangshi masütsü metetdaksür ta NSF-i sangdong nung ashi.

Iba lapi mapa aitsür aser Naga nung o India sorkar tsüingda political agreement ka agitsü atema Naga nung kanga yongya ataba mapang ka nung iba mapa atalokba aitsür ta GPRN/NSCN (Unification)-ia

sangdong nung ashi.

July 13, 2026 anüngdang Nagaland nung alirtem anema inyakba mapa atema tatok magütsütsü. Iba mapa inyaktertemi Naga nung nem chichiba yimjung majangshidaksünür ta WC, NNPGs-ia sangdong ka nung ashi.

Indian security forces aser Naga nung tepsetba agi dang parnok nükjidong atongtsü ta bilemba teloki iba tatalokba asoshi tenüng agitsü tasü aitsüla. Iba ajanga Naga nung aser India sorkar anaprong rara jazükertem lir ta sayur ta parnokisa ashi.

Naga political groups ajaki Ceasefire ground rules sülen anidaker kechiyong Indo-Naga yimjung maparen joko tatembang kati arur. Ajisüaka Nagaland nung alirtemi aremzüka ataba nungi tajangzükg agirtem lir. Parnoki Manipur nung ama Naga nung tsüingda mepetmesü adokdaksünür ta WC, NNPGs-ia metetdaksü.

Justice Lanusungkum Jamir-i stalking & cyber stalking anema ozüng akangshitsü ayongzükg



Kohima, July 15, 2026 (TYO): Nagaland State Human Rights Commission Chairman Justice Lanusungkum Jamir-i stalking aser cyber stalking ya meimchir akhüm anema inyakba mapatem lir aser iba khuret azüoktsü atema inyakyim takang latettsüla ta ashi.

National Commission for Women (NCW)-i Nagaland State Commission for Women (NSCW) den yaritepa "Prevention of Stalking & Cyber Stalking" ta ser state-level awareness sentong ka ayonga agidang Justice Jamir-i iba ya ashi.

India-i stalking ya "harmless pursuit" nungi ozüng alema inyakba mapa tamajung ka ama züngshitsü tenzükg. Bharatiya Nyaya Sanhita (BNS) nung Section 78 nung 'physical stalking' aser 'cyber stalking' ya ozüng alema inyakba ta lateta lir, saka iba ozüng nung aibelenerji 'tebur' ta dang zülua lir aser mezüng atema aibelenbabo bailable ta lateta lir ta Justice Jamir-i ashi.

"Tanü digital harassment ya

tetsür-tebur naprongi ajurur anungji ozüng ajanga senso ajak kümzüka ayutsüla" ta paisa ashi.

Alima nung technology, social media, spyware aser tanga online tools ajanga digital lendongtem bentsür arur aser stalking ya taoba dang nungi tezúbaba kümdaksür ta paisa shisem.

"Cyber stalking nung ya online harassment maneni asüba, mita reprangba, maitsü auyaba, amokmerenba, taila accounts aser temelaba melii nija osang lemsaba dena lir. India-i BNS aser Information Technology Act ajanga legal framework tashi itshiogo ajisüaka state balala nung bushisüngdangtsüsa akümba, technology kanga ainba, digital literacy ajema aliba aser online harassment mesenmetua amshiba ajanga ozüng akanga mebenshiteter" ta Justice Jamir-isa metetdaksü.

Justice Jamir-isa takoksa ajururtemi kulitem wazüka ayutsü, timtem agütsürtem den mejembitsü, timtem agütsürtem noktangtsü, online platforms nung abusive content osang

agütsütsü aser ozüng amertem teyari bushitsü metetdaksüogo.

"Linük nung tetsürtem anema mapa inyakba tajemba atalokba state tem rongnung Nagaland ka asütsü akok saka cyber stalking aser tanga digital abuse ataloker anungi item asoshi mapa rongdak inyaksü nüngdaker" ta NSCW Chairperson W. Nginyeih Konyak-i ashi.

Laisa digital literacy akangshitsü, cyber infrastructure tajungba akümtsü, shisaliok rejutem nung teyari agütsütsü aser victim-blaming anentsü ayongzükg.

Iba sentong nung Additional Superintendent of Police (Cyber Crime) Vizhatuo Michael Yhome-i 'legal provisions and reporting mechanisms'; Principal Forensics Analyst, NIELIT Kohima, Atoshe Lohe-i 'digital safety'; clinical psychologist Themmungla Raman Longkumer-i 'psychological impact of stalking' aser NSCW legal consultant Apila Sangtam-i 'women's legal rights' indang onüktem jembi.

NSEDMD aser IDAN nati Japanese Language Centre tenzükg

Dimapur, Chiteni/July 15 (TYO): Nagaland Skill & Entrepreneurship Development Mission (NSEDMD), IDAN ajanga July 15, 2026 nü Capital Convention Centre, Kohima nung World Youth Skills Day 2026 amungdang NSEDMD, IDAN Japanese Language Centre tenzükg, anungji Nagaland nung aliba lanurtem nem market nung nüngdakba skills agütsütsü aser alima tesem balala nung mapa inyaktettsü aoshi nüngdakba yimya sayutsü temlungtetba aliba tali jangjatsür.

Advisor, Higher Education and Technical Education, Temjenmenba-i iba sentong nung

jembidang, Nagaland nung aliba lanurtem dang kanga kera melenshia aoba 'global economy' nung tangar den kasa toktepa skill development aser entrepreneurship mapa inyaksü ayongzüka liasü.

Chief Minister Dr. Neiphiu Rio lenisüba kübok state sorkari inyakyim balala ajanga skill development nung temlung agütsür aser lanurtem nem industry den apet skills agütsüba nung NSEDMD-i tongti shilem agir, ta pai ashi.

Züngser aliba lanurtem timba akumba ya sorkari mapa kisüng nung manioktettsü, anungji entrepreneurship aser private sector nunga maongka

bushitsüla, ta Advisor-i kaketshir aser mapa bushirtem ayongzükg.

Alima sapang nung tokteptettsü asoshi practical skills ashitsü tongtipang, artificial intelligence aser machine learning ama technologies tasen tem amshitettsüla ta pai ashi.

Tang tasen tenzükg Japanese Language Centre yagi Naga nung lanurtem alima tesem balala nung mapa angutsü asoshi maongka tajungba bener arutsütsü, anungji skill development ajanga lanurtem senotsü lenmang angutsü asoshi stakeholders ajunga tali lungjemer inyaksüla, ta Advisor Temjenmenba-i ashi.

(Maneni tapak 2 nung...)



HANDWOVEN COTTON COLLECTION

SPECIAL SALE!

- ✦ Cotton mekkelas
- ✦ Bags
- ✦ Stoles
- ✦ Pouches & Many more...

Buy directly from the weavers who make it

17&18 JULY 2026 **9AM-5PM**
IMLONG PLACE
NEAR POLICE POINT
MOKOKCHUNG

*ALL PRODUCTS ARE HANDWOVEN IN THE TRADITIONAL LOIN LOOM

SUPPORTED BY


NCM aser CMU sobaliba tesendaktep akangshi

Dimapur, Chiteni/July 15 (TYO): Nagaland Conservatory of Music (NCM), India-i "Echoes of the Hills: Exploring the Choral Performances of India and Thailand" project ajanga Chiang Mai University, Thailand den sobaliba aser shisaliok tsütsü lungjemer sentong tuluka agia liasü.

Ibai reju ana tsüngta academic, artistic aser sobaliba tesendaktep tashi itshiba nung tongtipang mera ka liasü aser kasa mapang India aser Thailand tsüntta 'universal language of music' ajanga tangatetteo tali adokdaksü.

Iba project nung shilem ka ama Nagaland Conservatory of Music Choir aser Chiang Mai University Choir külemi ken atenba ajanga kenten-menü sobaliba tajung aliba linük ana nungi kentener tem lungjemer tesendaktep

menü ajanga India aser Thailand tsüngta mapang talangka tembar tajung ama lia aruba nung shilem agiba indang rateta ashi.

Chiang Mai University nung lungjemer shilem agiba dak alaka Nagaland Conservatory of Music Choir-i July 2, 2026 nü McGilvary College of Divinity, Payap University nung concert ka ayongzük, July 4, 2026 nü Thammanikom Church, San Sai District, Chiang Mai Province nung choral ken aten aser July 5, 2026 nü Refuge Fellowship, Chiang Mai nung special musical presentation ka ajanga shilem agia liasü.

Item sentong nung Chiang Mai Province nung aliba nüburtem, India nung Thailand nung oa alirtem, university nungi tesayur aser kaketshirtem tejangraba tulu nung arua shilem agia liasü.

Sentong tenzüka Associate Professor Dr. Sugree Gasorngatsara, Dean of the Faculty of Fine Arts, Chiang Mai University ajanga jembidang, sobaliba balala angatettsü asoshi linük balala nungi kentenertem lungjemer inyaksü tongtipang lir ta ashi.

Pranav Ganesh, Consul of India in Chiang Mai ajanga iba sentong ayongzükba nükjidong lemsatepdang cultural diplomacy aser kenten-

Kohima DC-i PM POSHAN Scheme aser SSA asadang

Dimapur, Chiteni/July 15 (TYO): Deputy Commissioner, Kohima, B. Henok Buchem mendenpuba sür PM POSHAN Scheme aser Samagra Shiksha Abhiyan indang District Level Review Committee senden ka pa indang office chamber nung July 14, 2026 nü mena liasü.

Deputy Commissioner-i pela agizükba o jembidang, scheme balala mapang shidak nung tajungtiba nung inyaksü atema department ajunga kanga junga amalitep akatsü nüngdaker ta ashi.

PM POSHAN Scheme asadanga reprangshimba mapang, jang o tzü mapang shidak nung agütsüba asoshi pelaba lemsatep saka

'quantity' aser 'quality' nung metokmeperi aliba indang lemsatepa liasü. Quantity shidak agizüksü mechi jang o tzü lema agütsüba mapang school nungi teshimtet nisungtem arua alitsü parnoki telemteba agia liasü.

Iba senden nung parnoki iron aser folic acid supplementation, deworming aser school health screening densema scheme kübok health interventions mapa kuma inyakba indanga reprangtepa liasü.

Samagra Shiksha kübok parnoki PM JANMAN aser DAJGUA kübok hostel tem yangluba osang agitep aser district nung tang tashi PM JANMAN kübok hostel kata meyangu ta jembia liasü.

District nung APAAR ID generation shilem 56 (IDS 21,949) yangluogo ta osang agüja liasü. Aadhaar meputepba, sorkar indang school tem nung computer tajung peria maliba aser Aadhaar enrolment asütsü asakba indanga parnoki jembia.

Iba senden nung coverage tajungba kumdaksütsü, awareness campaigns aser 'decentralisation of the authorisation process' amala onüktema jembia liasü.

Parnoki sorkar school tem nung solar lighting inokba aser Aadhaar updates indang osang agitep aser item mapa tashi taitba nung inyaksü asoshi mera agitsü jembitepa liasü.

MP S. Supongmeren Jamir-i Nagaland Angh ajuru



Dimapur, Chiteni/July 15 (TYO): Member of Parliament (Lok Sabha), S. Supongmeren Jamir Monsoon Parliament session nung adeni maodang Nagaland Angh Nand Kishore Yadav den ajurutepa liasü.

Iba mapang MP S. Supongmeren Jamir-i Angh den salem lemsatep aser Nagaland terenlok aser teyari onük kar jembia liasü.

Tena iba ama ajurutepa sensaksemba ajanga kati ka akumtsüboa amshiba aser State nung nüburtem ajungtsü mechi ketdangsürtem tsüngta amalitep aliba sayur.

NSEDM aser IDAN nati Japanese Language ...

(TAPAK 2 NUNGI...)



NSEDM mangdang lemsatepdang, Additional Secretary and Project Manager, NSEDM, IDAN, Vineet Kumar, IAS-i ashiba agi, skilling aser entrepreneurship yagi Nagaland tarutsü tia yanglushiba nung tongti shilem agitsü.

Küm shia July 15 nü World Youth Skills Day amungba

ajanga skill development, employability aser entrepreneurship tongtipang ta angatetdaksür aser kasa mapang lanur temi takok anguba benjonger, ta pai ashi.

Sorkar mapang kanga ajema kumer asünungji, lanurtem employment aser entrepreneurship ajanga rongsen

lenmang angutsü atema skill development ya nüngdak kumogo, ta Kumar-i ashi.

NSEDM ya October 2025 nung amenok aser tang tashinung lanur 3,500 dak tema nem training agütsügo aser ano training agir 800 shi skill development programmes balala agiba mapang lir, ta pai

metetdaksü. Iba mission ajanga nisung 1,000 dak tema mapa nguogo mesüra pei sasa aayanga chiyonga-jema liteter kumogo ta ashi.

NSEDM, IDAN Japanese Language Centre ya ajanga lanurtemi Japanese oshi angazüksü aser Japan aser tanga international markets nung mapa

inyaktettsü, ta Kumar-i ashi.

Under Secretary and Project Lead, Nagaland Skill and Entrepreneurship Development Mission (NSEDM), IDAN, Meripeni-i melepzüng o jembidang, stakeholders, partners aser shilem agirtem ajunga dang pelaba lemsatepa liasü.

MULUNG NEN



Wb. I. AKANGMONGBA LONGCHAR
(24th Oct. 1934 - 3rd July 2026)

Tetidang meima aliba Tsürapur tajung asür SAMANIR ASUNDANGDONG I. AKANGMONGBA LONGCHAR (CHUCHUYIMLANG) shirangba mapang nungi 3rd July 2026 akümlü wadang tempanger onok mangyim tia nung aliba mapang ozü dang meima, nübu, ali rongsen, shisatsü aser tamang Sarasadem agi yariteper ajak dang kangasa pelaba iba sangdong ajanga lemsateper.

Asen tulusang Tsüngremi kija kibong shia moajangma ta ozü tamang Sarasadem.

- Temiem Kinungtsü, Chirnur, Semchir, Anükapang aser Kinungertem.

Sonam Wangchuk dak langka atalokra Centre khuret asütsü: TMC

New Delhi, July 15 (Agencies): Climate activist, Sonam Wangchuk dak langka danga atalokra ibaji Centre sorkar aser Education Minister Pradhan na khuret asütsü, ta Bodhbarnü Trinamool Congress lenir, Saket Gokhale-i ashi.

Sonam-i anogo 18buba lumia longkak aitba anogo nung Gokhale-i shidi ka ajanga Union Education Minister, Dharmendra Pradhan dang Cockroach Janta Party (CJP) züngsemtem ajurua jembitsüla, ta metetdaksüba den külemi Sonam Wangchuk temang kanga mejungi lir, ta metetdaksü.

NEET aser CBSE tatidangtem nung ochimashi aliba aser paper leak asüba nung ajemdaker CJP-i Education Minister Pradhan-i menden nungi anentsüla ta takhangba agüja longkak aiter. Kasa takhangba agüja Sonam

Wangchuk-i June 28 anogo nungi tenzüka Jantar Mantar nung lumia longkak aiter.

Gokhale-i, Wangchuk-i lumia longkak ait tenzüka sülen pa temang touzük seret 8 dak tali ajemogo, ta metetdaksü.

Gokhale-i X ajanga, "NEET exam nung ochimashi aser paper leak asüba ajanga kaketshir 12 bo soseta süogo," ta metetdaksü.

Gokhale-i Minister dang, "TV interview ka nung nai-a aibelen nangzükogo. Democracy linük ka nung item ama tamakok atema minister-i menden nungi anentsüla. Ajisüaka nai menden nungi manenba ajanga kaketshirtem aser lanurtem lakh aika jashir," ta ashi.

Gokhale-isa, "Na menden nungi anentsü mesüra manentsü atema telemtetba agütsüjibo nü tangatetba. Ajisüaka kaketshir lakh aika atema tebilemtsü

katsür, Wangchuk den jembia pa tangatetba metettsü atema nai memelungtetba yabo maaksü tulu," ta metetdaksü.

Gokhale-i tanga sangdong ka ajanga, "Pa den jembiba ajanga sorkari kechi takoksa angutsü? Menden nungi anentsüji taaktsü maket sorkar ka dang nungi imlatsü makok. Ajisüaka Wangchuk süadokyonga kecha masü ta bilembajibo kanga majung. Hopta ana tsüngda pa temang touzük seret 8 ajemogo. Pa temang kanga mejungi kümogo. S o n a m Wangchuk dak langka danga atalokra Modi sorkar & Dharmendra Pradhan khuret asütsü," ta metetdaksü.

Air India tayimtsü tsükokba report October nung renemtsü: AAIB

New Delhi, July 15 (Agencies): Yaküm Ahmedabad yimti nung Air India tayimtsü tsükokba lendong nung nisung 260 asüba sülen küm ka dak tali süir, ajisüaka tang tashi iba tatalokba bushisüngdangba report merenemer.

Mongolbarnü Aircraft Accident Investigation Bureau (AAIB)-i Supreme Court dang, International agencies densema bushisüngdangba report ya taruba hopta 6 tsüngda renemtsü, saka final report jibo taküm October ita nung ang renemtsü, ta metetdaksüogo.

International Civil Aviation

Organisation (ICAO) temzüng kübok draft report ji mezüng US agency- National Transportation Safety Board (NTSB) den lemsateptsü.

"Iba report nung ajemdaker telangzüba anguba sülen o lemteptsü, iba sülen ang draft final report renema tim ketdangser, DG AAIB nem agütsütsü. Iba sülenji ang report ji sangdongtsü," ta AAIB-i metetdaksü.

Tanga linüktem den-a medemdanga AAIB-i, Japan Airlines Flight 516 (Jan 2, 2024) aser Jeju Air Flight 2216 (Dec 29, 2024) tsükokba report-a tang tashi mesangdong, ta metetdaksü.

Missionary Graham Staines tepsetsang Dara Singh chioktsüa akok

Bhubaneswar, Chiteni/July 15 (Agencies): Dara Singh jail nung chioktsü atema temepishiba agüja aliba atema Odisha state sorkari August 19 anogo tashi nungbo telemtetba agütsü atema mapang agütsür, ta Supreme Court-i metetdaksü.

1999 küm Odisha nung Australia nunger missionary, Graham Stuart Staines den par jabaso ana gari telung nung mi agi rongseta südaksüba ken o dak sendakba nung 2000 küm nungi tenzüka tang tashi Dara Singh tepuokdak lir.

Osangbener den jembidang Dara Singh atema ken o jembitsür, A P Singh-i, "State sorkari Court dang, iba temepishiba ken oji asadangtsü atema sentence review board senden menogo, ajisüaka ano mapang nüngdaker ta metetdaksüogo," ta ashi.

Paisa, Justices- Manoj Misra aser Vijay Bishnoi nati akümbe bench-i state sorkar nem parnoki lemzüksüba mapang matongdang pa chiokdaksüner ta shiogo, ta metetdaksü.

Bench-i, "Iba ken o ya maneni August 19 nü angadangtsü, aser iba anogoji matongdang committee-i telemtetba agir alitsüla," ta metetdaksü.

Sorkar osang ajanga ashiba agi, state sentence review board jagi Dara temepishibaji agizükner, kechiyong pa tepuokdak küm 26 jungogo aser tepuokdak pai yimya tajung benschir, anungji state remission policy kübok pa chioktsü temsüa lir.

Kasa ken o nung aitsür, Mahendra Hembram bo yaküm April 16 nü chioka liasü.

Taoba mapang Bajrang Dal züngsem, Dara Singh tangbo arrshi küm 62 lir.



1999 küm January 22 aonung Odisha nung Keonjhar district kübok Manoharpur yimdak Tenla ki ka anasa missionary Graham Staines aser par jabaso ana gari telung nung amoi oa aliba mapang nung Dara Singh leniba nung lokti kati gari nungji mi senokja liasü.

Dara Singh ya tang Odisha kübok Keonjhar jail nung lir. Pa ya Uttar Pradesh kübok Auraiya district nungi lir.

Odisha nung anojungi jail nungi chiokba telatetbatem kübok- taküm piyong tepuokdak ayutsü atema obendang agütsür alir ka tepuokdak küm 25 abensara taochi sayua chioktsü temsüa lir, ajisüaka ibaji review board aser state-i tama agizüktsüla.

199 küm missionary Staines den jabaso ana rongseta südaksüba sülen Central Bureau of Investigation (CBI)- i iba ken o nung nisung 18 nem tai tonglokka liasü. 2003 küm trial court kati iba ken o nung Dara Singh den nisung 12 aitsü.

Iba mapang nungji Dara Singh nem tasüba temerenshi aser tanüngba aibelenertemji taküm piyong tepuokdak ayutsü obendang agüja liasü.

Iba sülen küm ana lir Orissa high court-i Dara Singh nem tasüba temerenshi obendang agüja aliba temerenshi ajemja taküm piyong tepuokdak ayutsü obendang agütsü.



CIRCULAR ROAD BRANCH
Ground Floor, Faith Building, Near Khermahal Traffic Point,
Dimapur, Nagaland- 797112, Email: vjdima@bankofbaroda.bank.in

KIOJEN AGIADOKBA NOTICE
(For Immovable Property/lies)
{As per Appendix IV read with rule 8(1) of the Security Interest (Enforcement) Rules, 2002}
Tsünglanglen sign süa aliri **Bank of Baroda, Circular Road Branch, Dimapur, Nagaland** nung Authorised Officer ka ama Securitisation and Reconstruction of Financial Assets and Enforcement of Security Interest (Second) Act, 2002 aser Security Interest (Enforcement) Rules, 2002 nung Section 13(12) aser **Rule 3** nung aliba tashi amshia **April 28, 2026** anogo nung Demand Notice ka sen apur nem agüja:
1. MR. P. ALOTO ZHIMOMI (Borrower), S/o Khutovi Pukhato Zhimomi, H/No. 171, Near Govt. Hr. Sec. School, Lane 3, United Colony, Kuda Village, 'C' Khel, Nagarajan, Dimapur, Nagaland- 797112.
2. MS. VINOKALI ACHUMI (Guarantor), D/o Nivito Achumi, H/No. 171, Near Govt. Hr. Sec. School, Lane 3, United Colony, Kuda Village, 'C' Khel, Nagarajan, Dimapur, Nagaland- 797112.
dang notice nung shia aliba ama April 19, 2026 anogo tashi nung adokba sen **Rs. 2,12,83,658.80 (Rupees Two Crores Twelve Lakhs Eighty Three Thousand Six Hundred Fifty Eight and Paise Eighty only)**, iba denji külemi sentsüh aoba anogo tashi nung contractual rate nung further interest, costs, charges aser sen teindokba ajak notice anguba anogo nungi tenzüka anogo 60 tsüngda agüjang, ta metetdakja liasü. Ajisüaka sen apuri senji magütsüet, anungji sen apur aser public dang ya sangdonger, tsünglanglen sign süa aliri iba Act nung Section 13 kübok Sub section (4) aser Security Interest (Enforcement) Rules, 2002 nung Rule 8 nung agüja aliba tashi amshia **2026 küm July 13** anogo nung tsünglanglen shia aliba kiojen agiadokogo. Talisa sen apurtem/Guarantors/Mortgagors aser public dang shia aliba kiojen dak sendakba nung kecha inyaksangshi masütsü metetdaksür, mesüra **Rs. 2,12,83,658.80 (Rupees Two Crores Twelve Lakhs Eighty Three Thousand Six Hundred Fifty Eight and Paise Eighty only)** den sentsüh agütsüba anogo tashi nung contractual rate nung further interest, costs, charges aser sen teindokba ajakji Bank of Baroda nem agütsüsüsa akümtsü.
Iba Act nung section 13 kübok sub-section (8) nung aliba ama sen apur dang mapang shidak nung kiojenji alangzüktsü metetdaksür.
Bank of Baroda-i agiadokba kiojen osang tejangja:

Item No	Asset / Land description	Extent / Areas of Land	Location	Boundary
1.	Landed Property covered by Patta No. 220, Dag No 240, Mouza No. 02, Block No. 2, standing in the name of Mr. P Aloto Zhimomi, S/o Shri Khutovi Pukhato Zhimomi	00B-4K-01L 1083.61 Sq.M.	H. No. 171, Near Govt Hr. Sec. School, Lane-2 United Colony, Kuda Village, C Khel, Nagarajan, Dimapur, Nagaland- 797112	North: Mr. Hokishe, South: Mr. Zhenito, East: G Kits, West: Mr. Ashito.
2.	Village Patta No. 45	16053.51 Sq.M.	Near Hazadisa Village Welcome Gate, Khekiho Village, Dist.- Chumukedima Nagaland- 797112	North : Viloto P, South: P Aloto Zhimomi, East: Atomi K Zhimomi, West: Approach Road.
3.	House No. 72, Village Patta No. 57	11550 Sqft.	H/No. 72, Lane- 5(D), Block-iv, Near Thilixu Village Baptist Church, Thilixu Village, Chumukedima, Nagaland- 797112	North: Approach Road, South: Pastor Nitoshe, East: Approach Road, West: Kavito Aye.

Date: 13th July 2026
Place: Dimapur

Authorised Officer
(Bank of Baroda, Circular Road Branch)



TIR YIMYIM YIMOBILEM (EDITRIAL)

DIMAPUR THURSDAY, JULY (CHITENI) 16, 2026

Asaya o politics na bendangtsüla!

Tang ya alima nung kanga nüngtugu asaya football World cup asayaba mapang lir, anungji asenok aika amouia junga moui repranger, kechiyong asenok ya football asaya jangraba nübortem lir. Ajisüaka, tesusatsüka asenok Naga nungertembo toktsür, India dena iba asayamung nung shilem agitsüsa temsüa tangar den metoktepteter. Tang ama football World Cup asayaba nung shilem agirtem ya alima kin 48 nungi asayar aser kin shia nungi asayar nisung tenüing, goal keeper asem dena 26 agütsür. Item alima kin 48 rongnung Nagaland dang nungia tilaba alima kin Curacao aser Cape Verde ama dena lir. Iba ama asaya ka nung Nagaland-bo yimten nüchiso akaba alima kin balaka masüji kecha masü ta ashitsüa akok saka India ama ka nütsüng yongsük crore noklang tema aliba lima ka nungi tangar alima kintem den football asayatsü nisung 26 madoktetbaji football lima nung alirtem asoshibo tamakok tuluka lir. Iba tamakokji kodang bilemdangdir, India nungi football world cup nung shilem agitsüsa metemsütetbaji, asayar tajung madoktetba agia masü mesüra tangar asojen agi memenepa agia masü saka India nung football masü politics asayar, iba jagi shitakba football asayatsüsa nisung crore 140 nungi nisung 26 madoktetter. Ajak atema tia majung kaji, India nungertemi football asayatsüba dang nungibo politics asayatsüang tejangraba, ibayongji asaya tapu ajak nung asayaji masü saka politics asayaba angutsü. Aji oda, India nung asaya tapu shia lenir aser ketdangser tongtitemji asayar nisung masü saka yimten lenirtemi dang shilem agiba angutsü. Atangji, Nagaland-a India kübok asünungji asayabaren ajak ya 'political party' maparen amai dang küma aoba angur. Iba jagi Nagaland nung asaya tapu balala nung tejangrar aser asayar tajung liaka, tangar den tokteptetsüsa aikati maongka mengutettsü südi ta shisabolua bilemtsür. Atangji, asaya maparen ajak ya government-i akok tashi teyari agüja anepalurtsüla saka yariba dak alaka asaya dak aketba maparen nung pei ajung asaa azüoktsü memerangtsüla aser asayaba sentong ajanga pei kija rongsenren nung ajangzüksü mebilemtsüla. Asen lima nungbo asaya maparen nung asayar tajung adokdaksütsü bilema inyaker masü saka asayatem tenüing nung pei jurila senotsü tajangzük angutsü dang bilema shilem agia alitsüa akok. Ibayongji, tatishitsü agi, football maparenji football aayartemi masü aser Cricket asaya maparenjia cricket asayartemi masü saka, ashiko, kodanga ball memetsüngdangba nisung katiang football maparen ketdangsüa alitsüa akok aser cricket pad kodanga mamdangba nisung katiang cricket asayaba maparenji ketdangsüa alitsü akok. Iba amaji kodanga kecha asaya nunga shilem magidangba nisung kati kin ka asayaba maparen ketdangsütsü khuret aser maoangka agizükra, iba ama lenisüba nungbo alimai meteta tangar den toktepa asayatetsüsabo asayar madoktettsü. Tanü putu nung balaka, asaya ya temang anema alitsü atema asentzü sentoka temang arakzükba mapa ka dangbo masü mesüra medemertem den pelateptsü asayaba maparen ka dangbo masü saka senotsü tulu ajangzüketa, takar küma litetba tanga mapatem den kasasa asaya tapu shia nung alimai meteta takok ngua asayartembo, asaya agi tebok süngerang aika anünga kanga takar küma alir. Aji oda, tanü putu nungbo asaya ya asaya dangbo masü saka mapa lir. Iba tangatetba nung asayatsü sempet alirtemibo pei sempetji tamshi shia meranga inyaksüla aser tangar den tokteptetsüsa temulungtetba aser terenemba alitsüla. Aji oda, akok tashi asen lima nungbo Sports o Politics na ya bendangtsüla aser asaya nung party politics maitdaksütsüla. Kasaji, asaya tapu shia ketdangsertem nükjidongji pei lima nungi alimai metettsüsa asayar tajung adokdaksütsübaji asütsüla. Ajisüaka, pei lima nungi asayar tajung adokdaksütsü bilema inyaksü melen, asayartem tenüing nung kiojen yangluba aser anepaluba nung, chiyongtsü aser süoshi agütsüba nung aser talisa asayartem asoshi asayaba osettem jenjang dalang apia alir tajangzük agitsü merangba mapatem nungang temulung tagütsüba agüja inyakra, asenok asoshibo asayaji tagitarutsü ka masü saka asayamenüba asayatemang kümadoktsü. Ibaji bilema, India nungi madoktetra, Nagaland nungi asayar 26 adokdaksütsübaji asenok mapa asütsüla.

OLEMSABANG

SCIENTIFIC YIMYA NUNG SEN AIKA MEINTOKI YANGLUBA AK KI

~ Source : The Nokinketer

- * Scientific ak ki nungbo Rs. 1.34 lakhs aotsü saka teti amshia aruba ak ki (conventional rural pig house) nungbo Rs. 3,500 dang adoktsü.
- * Teti amshia aruba Ak ki yanglutsü temela saka talang ka malir.
- * Anungji sen aika meintoki (low-cost scientific) Ak ki yangluba tajungba.
- * Temokong nungi kümzuktsü atema ak ki atem ji süng mesüra aou agi yanglutsüla.
- * Sen aika meintoki yangluba Scientific ak ki nung ji Rs. 17,000 aotsü.

Koma sen aika meintoki Scientific Ak ki yanglutsü:

- * lenten-metong asameyangdang anüdoklen aser anüaolen repranga yanglubaji tajungba.
- * Cement agi yangluba atem tasazükji 16 feet x 8 feet asütsüla. Kilemji 8 feet x 8 feet injong (C.G.I sheet) agi tongbangtsüla.
- * Injong agi metongjemba tawa ji parnok asoshi anü awangtsü aser jana intokdak asütsüla.
- * Ak ki atem wapetji 4-6% kilentzü aolen ongken ana ali tomo atema tua ayutsü aser ibaji kodang ka süngdir ka ji amshitettsü.

Ak techanu mepodang ayutsü ki yangluba

- * Chiyungtsü aser tzü agütsütsü atema cement agi sübanger alidak tejaklen yanglutsüla.
- * Süng aser au koba talangka meraksai alir ibaji amshia yangluba tajungba.
- * Ak chanu inoka ayutsü atema Ak ki tezü len süng agi yangluba taktang nungji talem agütsü atema electricity amshitsü akok (light bulb or electricity heating)
- * Ak techanu tetsüdang nungi kümzüka alitsü atema Ak ki tezülen inch 10 ajungketer G.I pipe südanga atongtsüla aser inch 6 mesüra 7 atemtsüla, kong Ak chanutemji mejangdaksütsü. Iba ajanga tetsü arakzüa aser mejangdang techanu meyurutsü aser metepsettsü.

KAKET INDANG O SEMLOK :

~Mar Longkümer, Dimapur

'Armageddon Ola' Toshi Longchar-i züluba kakat, kanga junga abensaa zülüogo aser kakat kanga dang tajung ka ta O semlok tatsük ka zülur. Iba kakat ya amangbapur, tetezü Kümtetdakba Yisu Khrista agizüka Pa dak amangertem asoshi kanga tongtibang kakat ka lir. Iba kakat ya tapu 12 tashi lemsaa lir. Tapu ajak indang yangi mashir, saka tongtibang tangatettsü ka ana shisemer. Lai Ratetyim tongtibang tasatem, Laishibaji Laishiba agi ratetba yayim aser Ainkar shin O ratetba, item ya kanga tongtibang lir. Laishiba nung ainkar Shin O tem ataloka aruba, tang tatalokdak, aser ano tarutsü koda ataloka aotsü iba indang Lai tesayuba teratet (interpretation) jungjunga tatalokbatem den medemdanga agütsüogo. Tsüngrem O azüngertemi Lai dak ajemdaker tesayuba balala agütsür. Adangji amangbapurtema ya kobala agitsü, koba shitak? ta terata tia nung aika lir, kechiyong Laishirtemi teratet aser tesayuba balala agütsüba asen tendak lir. Saka kodang nai iba kakat ya züngdir ne mulung nung terata aliba to maka akümtsü aser Lai tesayubaji tali tejangjaba aser tajungba angateta akümtsü. Israel kin dak atalokbaji amangbapur ajak asoshi lir. Tanü Israel tiyongtsü ser item tatalokba indang jembir, saka ya Yisu dak amangertem ajak asoshi ta angatetdi. Kechiyong ibai alima kin ajak asoshi lir. Iba kakat züngra temulung nung terata aser tetsübu kecha malitsü. Amangbapurtem renema mita atatsü mapang ajungshiba kakat tajung ka lir. Ajaki kakettem meranga züngdi.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

West Bengal nung telok kati missionary nun tem amokmeren



Kolkata nung Auxilium Salesian Sisters (FMA) nungi nun kar sentong ka nung tangokba noksa nung angur.

July 15, 2026: Tawa West Bengal nung Khristantem anema inyakba kanga bulua atalokba mapang nung July 12, 2026 nüa West Bengal nung telok kati missionary nun tem amokmerenogo, ta osang ka ajanga metetdaksü.

July 12, 2026 nü North Parganas district nung Hindutva züngsem 60 shi Auxilium Salesian Sisters (FMA) indang convent telungi aiba sülen nun tem amokmerena tekülem sentong agiba chapel aser leper na bendokang, ta tuyua liasü.

July 14, 2026 nü osangbener den jembidang All India Catholic Union (AICU) Tir, Elias Vas-i, lokti jagi nun tem dang o tamajung aika shia amokmeren, ta metetdaksü.

Paisa, West Bengal nung sorkar tasen aruba sülen district aika nung Khristantem aser Khristan rejutem anema inyaker, ta metetdaksü.

Tenük kuli alirtemi ashiba agi, Hindu yimsü alia amanger lokti nungjagi kari, "Joko ner sorkar masü saka ozü sorkar lir," ta ayimden.

Yangji aliba Khristantemi, yamaji yimyim ayimba ajanga assembly election nung BJP-i takok anguba sülen Hindu nationalist teloktem tasü tali aitba kuli sayur, ta ashi.

Vas-i, tekülem agiba chapel aser leper bendoksü atema takhangba agütsübaaji linük temzüng kübok nütsüng ajema alirtem temeden anema lir, ta ashi.

"Amokmerenbaji ozüng alema tashiyim amshiba lir," ta paisa ashi.

All India Catholic Union-i state sorkar dang tangsa Salesian Sisters nem security agüjang aser tekülem agiba chapel aser leper wazüka ayutsü atema inyakang, kechiyong sorkar dang nungi temelaba meshiba sülen chapel aser leperji yanglu, ta metetdaksü.

AICU-isa nun tem

amokmerenertem nem temerenshi agüjang, ta takhangba agütsü.

Vas-i, "Tekülem agitsü temeden aser tekülem ki wazüka ayutsü atema India temzüng kübok temeden agüja lir," ta metetdaksü.

Ketdangsertemi aibelenertem anema kecha meinyakra ibaji ajanga minorities anema inyaker tem ano taliba tasü itdaksütsü, ta pai ashi.

AICU-i maneni iba tensa mita reprangtsü aser state sorkari nütsüng ajema alirtem kümzüksü atema kecha meinyakra onoki temaba ketdangsertem ajurutsü aser court nunga ken o benoksü, ta paisa metetdaksü.

West Bengal nung Arogo lenir kati, "Tawa Khristantem anema inyakba kanga bulua kümogo. Tesüiba hopta ana- asem Khristantem kanga amakba ajanga ozü nüburtem kanga shisabulur," ta metetdaksü.

Taoba hopta state yimtiba, Kolkata nung Khristan lenirtem senden ka mena state tesem balala nung Khristantem aser Arogo kiojen amakba tatalokbatem atema tebilemtsü akaba lemsatepa liasü.

Bangiya Christiya Pariseba (Bengal Christian Council) tentetsang, Herod Mullick-i, "Iba ya asalentong yanglur Tenla kitem, Arogo rejutem aser Khristantem amakba südi ta onoki tebilemtsü kanga akar," ta metetdakja liasü.

July 4 nü Paschim Medinipur district nung Khristan kiyimba sentong ka nung Hindu nationalist telok kati timtem agüja liasü, aser Arogo nung pastor Anup Ghosh pua tiyazü nung tai tongloksü.

Anogo ka lir July 5 nüa Purba Bardhaman district kübok Faridpur kiyong nung Grace Church nung tekülem sentong tagidak mapang nung Hindu nungertemi amak.

Kasa anogo nungjisa South 24 Parganas district nung mejangjaba nisungtemi Tenla ki tesüdak ka raksatsü aser kilem kolak nung Kangki raksatsü.

Nütsüng million 90 aliba West Bengal state nung Khristan nütsüngbo shilem kata majung; Hindu nütsüng shilem 70 aser Muslim nütsüng shilem 27 lir.

ANOGO ABEN TSÜNGREM DEN

Adam Ana

"Kechi koda temenen ka ajanga nisung ajak tai agütsütsü asoshi o bendangba aru, aji oda temeshi mapa ka ajanga nisung ajak metendaksütsü aser taküm agütsütsü asoshi angati sempetji aru" (Rom 5: 18)


Pei sasa tai angatetba ajanga Khristan aika Khristai agütsüba senmang nung nüchi makümer aser mainer. Parnok Khrista nung lir ta parnok sasa mangur, pa dak tali amangba mapang nungi parnok dak kechi temelenshi adok aji parnoki mangur. Parnoki parnok shitakba ayakji mejangjar. Tejen Adam ayak nung dang parnok alir.

Khrista, tatembangba Adam indang asenoki metettsübaaji, pai Tebu Tsüngrem dak bendanga metaloker ali. Mezüng Adam Tsüngrem nungi pilar alitsü tatidangbai kokdaksü aser pai tajung tamajung metetba süngjang nungi achi. Pai tiyazü nung amang. Saka Yisuiibo Tebui mulungba nung metaloka ali (Yn. 5:30; 6:57; 8:42; 14: 10; 17:7).

Tanabuba tepilaji tanela taküm. Kodang Adami temenen mena, pa tanelaren nung asü. Mezüng Adam ama, Yisua aso, saka mezüng Adam ama pai pa tanela taküm temenen ajanga mesamadaksü.

Tatembangba Adam- Yisu Khrista shiba ajanga ni kümzüksü aser temaitsü ajen - Iba asoshi Ne tenüng asanger. "Oba. tanü shitakba kü ayak nung alitsü ni Ne teyari nüngdaker" ta asenoki tashi meshidi.

Arunachal nung taoba mapang SBCEA Exe. Secretary, Rev. Khoda Tana süogo



July 15, 2026: Arunachal Pradesh nung taoba mapang Baptist Association nung Executive Secretary aser state nung tribe tulutiba Nyishi nunger rongnung lenir, Rev. Khoda Tana July 11 nü süogo; pa arrshi küm 82 liasü.

Rev. Khoda ya 1944 küm December 1 nü Reyi yimdak (tangbo Pech) aso aser pa lanuwayongi par tsürabur anaprong süadok.

Pa Assam nung aliba Christian mission schools nung zünga intet aser 1953 küm bapti. Pa 1963 küm class ter pass asü aser 1971 küm J.N. College, Pasighat nung graduate asü.

Sagalee-Doimukh area nung graduate asür mezünpur

rongnung pa-a ka liasü.

1974 küm pa state civil secretariat nung inyakba mapang nung region tesem ajaklen Khristantem anema inyakba kanga bulua aküm. Iba kümji par kin indang Arogo 47 Tenla ki rongdoksü aser pa-pua Rono yimdak hopta ka shi puok.

Par kini pa dang mepishiba nung ajemdaker 1978 küm pai sorkar mapa toktsür mezügbuba state Legislative Assembly election nung Doimukh-Sagalee menden nungi toktepa liasü, saka pai tanabuba jenjang dang angu.

1980 küm nunga pai People's Party of Arunachal ticket nungi toktep saka tesasatsüka pai tera agi takok

menguteti liasü.

Iba sülenjibo pa Subansiri Baptist Christian Association nung toklang inyak. Pa iba Association nung Executive Secretary, Tir aser Treasurer inyaka liasü. Tangbo iba Association dang Nyishi Baptist Church Council (NBCC) ta ajar.

Nyishi Kristian Bemin (Nyishi osangtajung ken kaket) atema pai Nyishi nunger oshi nung osangtajung ken 248 meyipzüksü aser 2014 küm 6buba adok nunga okila zülüja liasü.

Pa asüba osang angashia taoba mapang Chief Minister Nabam Tuki, Itanagar MLA Tech Kaso, Arunachal Christian Forum Tir James Tech Tara, All Nyishi Youth Association aser taoba mapang MLA Likha Saaya nunger densema lenirtem aikati asür nem akhüm agütsü.

Rev. Khoda Tana asüpila sentong July 13 nü NBCC indang Nirjuli Pastoral Range kübok Nirjuli Village-I nung agi.

Asüpila sentongji Arunachal Theological College Principal, Rev. Halli Likha aser pastor, Rev. Dr. Tagang Gelo nati bendanga agi.

Sentong nung Nirjuli Town Baptist Arogo nung lanurtem leniba nung osangtajung ken aten aser NBCC nung lenirtemi tasü mang süngdenji apur oa leper nung remtsü.

Rev. Khoda Tana-i pa kinüngtsü Jumshi Tana den jala asem, jabaso ka aser semchir 9 toktsür pilaogo.

AO OSHI ANGAZÜKDAK:**TANÜ ANGAZÜKTSÜBA OJANG****Yonglang**

(n) yong ishika alentepba, yong tejong (bundle of splints type bamboo robes)

* Akhi mapang süra ki asü dang yonglang aikasa agia liasü.

Yongmeki

(n) yong agi yong alena yangluba (bamboo craft)

* Tanü asüng lanurtemi yongmeki mapa junga meinyakteter.

OLONG PAITEP # 7567

1		2			3		4		5
				6		7			
8									
						9			
			10						
11									12
					13			14	
15									
16								17	

TIPIEN

- Nüji masü
- Techinütsüka
- Aketa shirangba
- Pi
- Amena
- Kinü
- Tanang masü
- Lenmang
- Nübo tedi
- Tuoshi
- Shiruru apuba temenatsü

-

(4)

-

(6)

-

(5)

-

(6)

-

(5)

-

(6)

-

(5)

-

(6)

-

(4)

LANGTSÜNGLEN

- Jila tulu
- Sarasademdang tembang
- Tarutsü indang ashirtem
- Alia
- Mojing
- Tai inyakba metet
- Medemer chijiba
- Tatokba / Amadok
- Anügdang masü
- Jabaso masü

-

(5)

-

(4)

-

(6)

-

(5)

-

(6)

-

(5)

-

(4)

OLONG PAITEP # 7566 TELANGZÜBA**TIPIEN :**

- Tesangra, 5. Mungo, 7. Kisen,
- Salem, 12. Semki, 14. Kilem,
- Kensü, 16. Sangpang.

LANGTSÜNGLEN :

- Temesen, 2. Raksa, 3. Aon,
- Aso, 6. Nile, 9. Alizüing,
- Omen, 11. Lemta, 13. Ola,
- Kin.

NAI-A YA METETTER

Michael ta ser pop legend Michael Jackson taküm nung ajemdaker yangluba biographical drama ajanga otsü tasen ka yangluogo. Iba film ya alima nung \$1 billion mark ajangba mezüngbuba biopic kümogo. Michael Jackson'er nephew Jaafar Jackson-i tongti shilem agiba film ajanga international markets nung \$629.8 million aser North America nung \$371.8 million aazükteta worldwide total \$1.001 billion aazükogo ta Variety ajanga metetdaksüogo.

Taoba police ketdangsür Thounaojam Brinda-i Congress nung aden

Imphal, July 15, 2026 (Agencies): Taoba Manipur Police ketdangsür aser anti-drug crusader Thounaojam Brinda-i Indian National Congress nung denogo.

Brinda-isa Yaiskul Assembly Constituency nungi tokteptsü metetdaksüogo aser 13 buba Manipur Legislative Assembly election atema la campaign tenzükogo.

Imphal nung sentong ka nung taoba Chief Minister aser Manipur Pradesh Congress Committee (MPCC) president Okram Ibobi Singh-i züngsem tasentem pelashishia agizük.

Iba sentong ya Manipur Pradesh Congress Committee (MPCC)-i Congress Bhavan, Imphal nung ayonga agi.

2027 Assembly elections ya kanga tongtipang asütsü aser voters-i Manipur nung dang masü saka Centre nung sorkar melentsü atema yaritsü mepishir ta Ibobi-i ashi.

Congress nung adenertem rongnung taoba bureaucrats, legal professionals, retired defence personnel aser politicians dena lir.

Parnok ya Thounaojam Brinda (retired MPS officer, Yaiskul), M Anwar Hussain (Lilong nungi taoba BJP



candidate), Kh Devendro (taoba MLA, Sekmai), Colonel Md Sahid Khan (retired, Lilong), Laishram Sashibhusan (senior advocate, Uripok), Longjam Suranjoy (retired IUCB AGM, Keirao), B Sharat Sharma (retired associate professor, Yaiskul), Th Oxford (retired district supply officer, Thongju), Yengkhom Sanjeep (retired assistant commandant, Thangmeiband), Kh Gambhir (retired executive engineer, Power Department), aser Md Nasir Khan (retired teacher, Lilong) nung lir.

Yaiskul nung alirtem bendanga agüja tenzüksü aser constituency dak sendakba tebilemtsütem asoshi inyaktsü ta Brinda-i ashi.

Manipur nung mapang talangka mepetmesüa aruba ya

sorkari ozüing alema inyaktsü aser kiralongratsü ajungmesoa inyakdaksüba ajanga lir, iba ya kin o kin mepetmesü masü ta Brinda-i BJP-i aniba sorkar aitsü.

"Congress-i dang Manipur nung BJP nem tamakok ngudaktsütsü aser yimjung bener aruba den tensa süngjemdaktsütsü ta amangba agi ni iba party nung adener" ta laisa ashi.

Brinda-i tang agi tanaben atema Yaiskul nungi tokteptsü meranger. 2022 Assembly elections nung lai toktep saka tang teinyakdak Manipur Legislative Assembly Speaker Thokchom Satyabrata tsüingdang tamakok angu.

Brinda-i Manipur Police ketdangsür ka ama inyakdang 2018 nung anti-drug operation tulu ka takok ngua inyakba sülen nisungtemi meteta aküm. Ajisüaka, iba ken o nung tongti süa tai tongloktsür metentsüba sülen lai ibaji anema la indang gallantry medal meyipa agütsü.

Iba sentong nung Inner Manipur Lok Sabha MP Bimol Akoijam, Congress lennir Gaikhangam, taoba Lok Sabha MP Thokchom Meinya aser Congress MLA tem- Okram Surjakumar o Thokchom Lokeshwar nung aden.

Assam nung Day Care Cancer Centres 17 lapoktsü

Guwahati, July 15, 2026 (Agencies): Assam sorkari Day Care Cancer Centres 17 lapoktsüba osang metetdaksüogo aser iba ya cancer treatment services akangsitsü atema lir.

MLA Bolin Chetia-i tetsürtem aser tanurtem dak cancer azüoktsü aser anepalutsü indang maparen inyakba metetnua asüngdangdang Health Minister Ashok Singhal-i iba osang metetdaksü.

Tesüiba küm ishika Assam

Cancer Care Foundation (ACCF) ajanga oncology infrastructure ulushia arur. Guwahati nung State Cancer Institute (SCI) dak alia Dibrugarh, Barpeta, Tezpur, Nagaon aser Silchar nung specialised cancer centres lapoka lir aser chemotherapy, radiotherapy, cancer surgery o diagnostic facilities agütsür ta Minister Singhal-i ashi.

Nübertemi asoshi cancer treatment melamela angutsü atema Day Care Cancer Centres 17 lapoktsü. Item centres ya

Dibrugarh, Barpeta, Silchar, Jorhat, Tezpur, Lakhimpur, Dhubri, Kokrajhar, Diphu, Goalpara, Tinsukia aser Gauhati Medical College and Hospital (GMCH) nung lapoktsü ta paisa ashi.

Item centre nung chemotherapy aser follow-up care angutsü aser iba ajanga cancer agi shirangertem senzusenbong nung mapang endokba aser treatment jenjang tajemba akümsü ta Minister-isa metetdaksü.

Arunachal-i Norway company den MoU sign sütep

Itanagar, July 15, 2026 (Agencies): Arunachal Pradesh-i July 14, 2026 nü Norway nung amenoka aliba Tidal Sail AS den Memorandum of Understanding (MoU) ka nung sign sütepogo.

Iba MoU ya 500 kW River Kinetic Energy Demonstration Project atema lir aser iba ya India nung mezüngbuba river kinetic energy demonstration plant asütsü.

India-Norway Green Partnership kübok Centre for Earth Sciences & Himalayan Studies aser Tidal Sail AS tsüingda MoU nung sign sütepogo.

Iba mapatong ya Ministry of New and Renewable Energy and Innovation Norway ajanga nungiter. Iba mapatong ajanga ayong tzü indang current nungi electricity adokba technology sayutsü.

Iba ya Arunachal Pradesh indang clean energy transition nung tongtipang alizüing ka lir ta Science and Technology Minister Dasanglu Pul-i ashi.

Arunachal Pradesh nung ayong aika lir aser item ajanga renewable energy adoktsü lenmang sadema lir. Iba mapatong ajanga energy security tashi aitsü aser natural resources

timi amshitsü ta lai ashi.

Minister Pul-isa MNRE, Ministry of External Affairs, Royal Norwegian Embassy, Innovation Norway, Tidal Sail AS aser tanga partner institutions dang iba mapatong nung yaritepba atema pelaba metetdaksü.

"Arunachal Pradesh nung river systems ajanga river kinetic energy technology sayutettsü. Iba ajanga tang aliba renewable energy sources melenzüksü aser long-term energy security tajungba akümsü" ta Norwegian Ambassador to India May-Elin Stener-ia ashi.

Trump-i Iran mokdangtsü tuyur, Tehran-ia amokmerener

Cairo, Chiteni/July 15 (Agencies): US-i Iran nunger rongnendak tesemtem tanaben mokdangshia Strait of Hormuz agitsü atema anatsülen nungi ano maktepba sülen Bodhbarnü Iran-i regional energy exports tali shibangtsütsü amokmerenogo.

Red Sea atema süngkum ka ama amshiba Bab el-Mandeb ajanga senzüba rong tem amokmerenba ya June ita rara anena alitsü züngzüktepba raksaa Iran aser US tsüingta taoba hopta nungi tensa tamajungba akumba sülen ataloker.

US aser Israel nati February 28 nü Iran dak maka tenzüka rara ajanga Iran nungeri Gulf linüktem nung US mitkar aliba tesemtem nunga amaker aser alima nung energy supplies nunga kanga mejungi kongshia ano totzü aser osettsüset jenjang tali akumtsü tetsübo lir.

Strait of Hormuz agitsü tebilemba nung inyaker ama US mitkari Indian Ocean nung par

naval pirates yokba sülen Iran indang Islamic Revolutionary Guard Corps-i Bahrain, Kuwait aser Jordan densema US military sites nung amak ta Bodhbarnü ashi.

"US aser par tembar ajangzükbaba tanga export corridors ajunga shibangba agizüktü US renema alitsüla. Regional energy exports ya ajaki lemsar mesüra kata nema magütsür," ta IRGC-i ashi.

Mongulbar aonung menur US mitkari ashiba agi, parnoki Strait of Hormuz aser Iran nunger tzükumlen tesemtem nung military targets aika nung ghonda tenet makogo.

US mitkari Bodhbarnü nungi ano tenzüka amaker ta ashir, aser ibai Iran nungeri Strait of Hormuz nung shishilempaba rong tem amakba nung amshiba tashi ajemdaktsütsü nükjidong nung lir ta ashi.

Iran-i taoba hopta shishilempaba rong tenet dak amak aser iba mapang rong nung ketdangsür ter shi tepset,

sama mesüra yirutsü, ta United States-i ashir.

Iba rara asadanger temi ashiba agi, US aser Iran na ita ka tejakdang interim ceasefire mezülutepdang rara aliba ama kasa jenjangi meyipa ogo, aser tashi ajak amshia raraba dangibo memeyiptsü amai lir, saka tensa tamajungbabo akumtsü amai lir.

Parnoki ashiba agi, Iran yagi Bab el-Mandeb shibangtsü atema Yemen nung par tembar Houthis amshitsü akok ta sayur, anungji Washington anema front tasen ka lapoktsü aser alima nung energy asoshi tongtipangtiba lenmang ana ya lendong nung yutsütsü.

Iba rara mechi Iran yagi Strait of Hormuz nung rong senzübatem teti asoshi azüokner aser ibaji ajanga senzüba rong tem dang sen meshiner, koba region nung temelenshi tulu asütsü, kong mapang talangka nungi US ya security agütsür ama liasü.

(Maneni tapak 8 nung...)

Drone yanglutsü atema EU aser Ukraine tenangzüktepba yangluogo

Kyiv, Chiteni/July 15 (Agencies): Ukraine aser European Union na Kyiv indang expertise aser European industrial capacity na longjemer project ka amenoka drone taliba yanglutsü asoshi tenangzüktepba ka yangluogo, ta European Commission Ursula von der Leyen-i Bodhbarnü metetdaksü.

"Asenok tashi longjemtsü nüngdaker," ta von der Leyen-i Kyiv nung linük Statehood Day amungba mapang ashi. "Iba tenangzüktepba ajanga Ukraine indang shisatsü aser Europe indang industry tashi longjemdaksütsü."

Ukraine-isa, linük balala den iba amala mesükba tenangzüktepba yangluogo. Ankara nung taoba hopta NATO summit nung tir Volodymyr Zelenskiy-i tenangzüktepba asem nung sign süogo, aser ashiba agi, tenangzüktepba asem yangluba densema ajak senteper teku jungogo.

Ajisüaka Bodhbarnü tenangzüktepba yangluba ajanga European Union kübok linük aser company tem ayimjemtsü.

"Drone aser anti-drone system yanglutsü atema nenok shisatsü ya tangar dang nungi balaka lir," ta von der Leyen-i ashi.

"Asenok longjemer inyaktüsü, kechiyong iba tesem nung Europe amokmerenba onoki meteta lir. Onoki EU züngsemtem litsü adena inyaksangshiba nguogo," ta laisa shisem.

Von der Leyen-i ashiba agi, EU-i technology aser industry aser teküzmükba kübok drone yanglutsü atema tesemtem agütsütetsü.

2022 küm February ita Russia-i linük amakba mapang tashi nung Ukraine-i drone yanglutsüba dak sendakba nung shisatsü peria bener maliasü, saka tang sophisticated drone industry ka amenokogo.

Zelenskiy-i drone dak sendakba nung tenangzüktepba yanglutsü atema linük aika semdangogo aser talisa Middle East semdangogo, kong Gulf linük temi Iran-i parnok amakba atema telangzüba agütsütsü asoshi Ukraine teyari agitsü tejangraba lir.

DRC nung Ebola tashidak menar 2,000 dak tema jungogo

Kinshasa, Chiteni/July 15 (Agencies): Democratic Republic of Congo nung Ebola tashidak menar 2,011 jungogo, kong nisung 754 bo süogo. Tashidak prokshia aoba ajanga mepetmesü nung aliba mapang itasen shidak magütsüba aser mapa inyakba tesem majungba ajanga healthcare worker temi longkak aita liasü.

Healthcare worker temi northeastern Ituri province kübok Bunia General Hospital nung Bodhbarnü longkak aita mozüki kikümtong nokdanga ayu. Parnoki ashiba agi, iba tashidak poktetba sülen parnok mapa atema tang tashi taah agüja mali.

Iba tesem temeket nung tangalen longkak aitiba sülen Bunia nunga longkak aitogo, koba tashidak poktetdak teyongtsü lir.

Rwampara General Hospital nung epidemiologists aser leper aturtem densema healthcare worker tem aikati Hombarnü parnok mapa toktsür ao. Parnoki ashiba agi parnok nem ita aika taah magütsür.

Medical charity Doctors Without Borders (Medecins Sans Frontieres, or MSF)-i ashiba agi, tang tashidak pokteter aliba ya Ebola tashidak poktetba rongnung tulutiba aser ajak dang takaratiba renloka odar.

World Health Organization-i Mongolbarnü, asürtem indang official record ya officially mangaoka aliba dang nungi ana nungi pezüben agi timba asütsü akok ta tekümdangtsü metetdaksüogo.

Tang Ebola tashidak pokteter aliba ya May 15 nü tenzüka aser iba mesen Bundibugyo strain agi tenzükdaktsüba lir. Iba strain asoshi tang tashi vaccine mesüra treatment mali.

World Health Organization Director-General Tedros Adhanom Ghebreyesus-i ashiba agi, Bundibugyo virus agi kongshir alirtem ya antiviral drug ka agi aneptsü maneptsü aji tendangtsü atema Mongolbarnü tenzüko.

OFFICE OF THE CITIZEN CLUB LONGSA

Hq- Longsa, Mkg-798601

TENUNGSANG AGUTSUR

Wb. Tongpangkoka Pongen aser Wt. Tiapokla tena jala Kr. Temjenmenla Pongen NU Undergraduate tatidang, 2026. Fazl Ali College nungi, Ao subject topper takok tolu anguba tepela Citizen Club sangeri tenungsang agütsür.

Teyanglur Tsüngremi ne wadang nung ano maneni moaja len aniangma.

Sd/-
Sb.Arensosang
Tir
Citizen Club Longsa

Sd/-
Kr.Temjenyongla
Tongti Zülur
Citizen Club Longsa

Skill ya asen sasa asen nem agütsüba sempet lir. Iba ya ajangshiba ajanga ainer aser pei sasa pei peria alitsü asen nem tashi agütsür.

- Narendra Modi



Nü sempet nem na anidakjang

Nü sempet

Nü mangdang takok leni nü sempet nem anidakjang

6+ CRORE
Youth Trained

57+ LAKH
Apprentices Engaged

13,800+
Industrial Training
Institutes (ITIS)

2800+
NSQF Aligned
Courses



Nü meyong maitsü yangertsü mapangji tangya lir. Akhi alemli mapang nungi amshiba osettsüset süang mesüra putu tasen courses tema süang, Industrial Training Institutes (ITIS), Pradhan Mantri Kaushal Vikas Yojana (PMKVY), Jan Shikshan Sansthan (JSS), aser Pradhan Mantri National Apprenticeship Promotion Scheme (PM-NAPS) ajanga training tajung, industry-i agizükba kulüzüng kaket, aser na sen aaba mapang angazüktsü maongka agütsür.

Skill India Mission nung denang aser SIDH App Download süang



World Cup: Spain-i France koka final tongtetogo



Chiteni/July 15, 2026 (Agencies): South Africa nung 2010 kum World Cup akokba sülen Spain team tang mezüngbuba FIFA World Cup final ka tongtetogo. Semifinal nung parnoki goal 2-0 agi France koka liasü.

Spain-i iba asaya akokba ajanga France team World Cup asemububa atonga final-i ia Italy-i asaya 37 tashi khendanga tamakok mongui asayar record yanglur aliba den kasa akümtsü aliba nokdangogo.

Asaya ya team anapronglai kasasa dang asaya tenzük, saka mapang tatsüka lir Spain-i tajungba asaya liasü. Lamine Yamal-i tachichilen nungi France nunger defender tem nem timtem agütsü aser Lucas Digne-i box telung nung pa dak metsülöksüba sülen penalty ka

mena liasü. Iba penalty ya Mikel Oyarzabal-i aibelen mesüi metsüokja Spain goal ka agi tejakdang aküm.

Asayamung tepeyong nung Kylian Mbappe iba asaya nung tajemba asayaogo aser Spain pur defence talangka atua asayaba ajanga pa aiben offside mena liasü.

Asaya mekoki asaya aliba mapang ka nung William Saliba yirur tuguatokba ajanga Didier Deschamps-i aniba team jenjang tamajungba kümshi. Spain-i maneni asaya azüoka asaya aser France nem attack süa asayatsü asoshi maongka kecha magütsü.

Asaya tanabuba shilem nunga kasa otsü dang asü. Asaya tenzük ghonda ka ajungtsü mapang Dani Olmo-i ball tajung ka agütsüba Pedro

Porro-i idakja parnok goal ana agi tejakdang aküm.

Goal idaktsütsü atema merangba mapang France-i Desire Doue aser Rayan Cherki na yok, saka parnoki maongka mongutet. Doue-i goal idaktsütsü maongka tajung ka anguba magitet, aser kasa mapang nung Mbappe-ia team asoshi kecha mesütetba ajanga pa tezü adangba nguogo. Asaya tatemtsü lia France captain nem ya yellow card ka agütsü aser pai free-kick ka metsütoka liasü.

Asaya tatemlen France-i goal idaktsütsü atema nongshia asaya saka menoatoker liasü aser Spain-i kanga süngjema asaya-a asaya tembangdaksü aser tang World Cup tanabenbuba akoktsü maongka lir.

Japan Open: Sen, Ayush, Unnati nunger ajak tsükogo

Chiteni/July 15, 2026 (Agencies): Japan Open Super 750 badminton tournament tenzük tananübuba India nunger asayartemi junga masayateti Ayush Shetty, Unnati Hooda aser Lakshya Sen nunger ajak Bodhbarnü mezüngbuba round nung tsükogo.

Asia Championships finalist Ayush-i mezüngbuba round nung second seed aser taoba mapang world champion Kunlavut Vitidsarn den kanga toktepba asaya saka 19-21, 25-23, 15-21 agi tamakok angu. Tena tsüngda minute 82 asaya liasü.

World No. 24 Unnati Hooda-ia Chinese Taipei tsür Huang Yu-Hsun 21-16, 16-21, 15-21 agi makokba sülen tsükogo. Tena tsüngda tang tashi nung anaben asayaogo aser anabenprongla Hooda-i makok.

Tebur kija asaya nung All England Championships runner-

up Lakshya ya 16-21, 14-21 agi Japan nunger asayar Koki Watanabe-i ayong ayonga kokogo. Iba asaya akokba densema Watanabe-i tang tashi nung Sen pezüben kokogo. Sen-ia pa asemben koker lir.

Küm 17 sülen taküm New Delhi nung taruba ita World Championships ayongzüka asayatsü aliba mapang tang India nunger asayartem aika mezüngbuba round nung tsükatokba ya tezüdangtsü ka lir.

Iba asayamung nung India nunger rongnungi Olyimpics nung medal ana tashi ngur alila PV Sindhu aser tarep temeyoktep asayar Dhruv Kapila aser Tanisha Crasto nunger dang anunga lir.

Sindhu Brehostibarnü tanabuba round nung China tsür Han Yue den asayatsü, aser Dhruv o Tanisha na top seeds Feng Yan Zhe aser Huang Dong Ping na den asayatsü.

Eng den mezüngbuba ODI nung Bumrah alizüng tasen ka tongtetogo



rongnungi timtiba asütsü.

Kasa mapa nung India nunger asayar kati bendanglen oa linük ka nung wicket timtiba agiba list nung pa Kapil Dev sülen tanabuba jenjang nung lir, shibai Australia nung wicket 108 agir lir. Australia nung wicket timtiba agiba asayartem rongnung Bumrah tasembuba nung lir. Tanabuba jenjang nung Shami lir, pai wicket 81 agir lir.

Bumrah-i England nung Test asaya nung wicket 51 agiba ya India nunger rongnungi timtiba lir, koba Ishant Sharma tenati ajangzükteter lir.

England nung Format asemprongla nung Bumrah-i wicket 102 agir lir aser pa jakdang Ravichandran Ashwin, Jadeja, Anil Kumble, aser Kapil Dev nunger dang lir.

Bumrah aser Kapil nati dang opponent ka dak tema indang wicket 100 dak tema agir lir. Bumrah-i England aser Australia nung wicket 100 dak tema agir lir aser Kapil-i Pakistan, West Indies, aser England nung wicket 100 dak tema agir lir.

Iba asaya ya India-i wicket trok agi kokogo. Asaya nung Axar Patel-i ball kanga junga ona wicket pezü agi.

Batting amenba mapang captain Shubman Gill-i run 80, Axar-i out mesüi run 57 aser Washington Sundar-ia out mesüi run 52 yanglua India-i iba asaya akokba nung teyari agütsü.

BENDANGLI OSANG :

Tapak 7 nungi...

Trump-i Iran mokdangtsü tuyur, Tehran-ia...

Bodhbarnü IRGC-i, America temenen tem tatem kati maru tashi Strait of Hormuz shibanga alitsü ta ashi. February ita rara metenzükdang alima nung totzü aser natural gas shilem 20 shi anogoshi iba tesem ya ajanga bena liasü.

US-i Iran nunger rongnendak tesemtem nung mokdang tasen magütsüdang iba strait ajanga Iran den sendaktepa aliba rong tem ajanga senzüa liasü.

Bab el-Mandeb yagi Red Sea nungi Gulf of Aden sendakteptsür, aser iba ya ajanga Saudi totzü ayoker aser alima nung senzüba rong shilem tuluka ajanga aor.

Hombarnü Houthis ketdangtsür kati, Saudi Arabia-i Yemen dak amakba manenra parnoki iba tzü lenmang shibangtsü renema lir aser ibaji ajanga totzü jenjang barrel ka nung sen \$200 tashi akumtsü, ta shia liasü.

Hombarnü Saudi Arabia-i par kübok aliba airport ka nung bomb pokloksü ta Houthis sepaitemi tai tongloksüba sülen parnoki Saudi Arabia nung missiles khalokja liasü.

Taoba ita interim ceasefire deal yangluba ya Iran indang nuclear sentong densema maneni jembishinü tali akatsü, teti asoshi rara anentsü asoshi liasü, saka jembishinü nung terenlok makai anena lir.

US Tir Donald Trump, shiba dang par linük nung nüburtemi taoba mapang meraratsü nungshir, saka pai Tehran-i jembishinü metenzükshira Iranian power plants aser apu tem taruba hopta amaktsü Mongulbarnü amokmerena liasü.

"Ni energy targets ya tesü atema kumzüka ayutsü, saka tatem nung ni energy targets amaktsü," ta Trump-i ashi.

US nunger yimjung ken o jembirtemi külem Iran nunger tem dang tezüngzüktep yanglu tajungba ta shia arur, ta

Trump-i ashi.

Tensa tamajungba akumdang Hombarnü Trump-i strait ajanga senzüba rong tem dang sen shilem 20 meshitsü angatetba lemsatapa liasü. Ajisüaka Mongulbarnü pai iba tangatetba melenshia Gulf linüktem den investment deals yanglutsü lenmang bushitsü ta ashi.

Iba rara yagi talisa Iran aser Lebanon nung nisung meyrirjang aika tepsetogo aser million aika pei ki yutsür tesem balala nung prokshia lir. Kebanon nungya Israel aser Iran-i yariba Hezbollah telungpur telok tsüngta rara tenzükshi.

US-i tawa southern Iran amakdang civilian 30 shi tepsetogo, ta Iran sorkari indang odongtar Fatemeh Mohajerani-i Bodhbarnü ashi.

Yasüng US-i linük southeast tsütsü Bampur military base amakdang active-duty aser conscript personnel tenet tepset, ta Iran army-i ashi.

BILEMDANGANG

"Tamagitsü o aika jembiba dang nungibo tagitsü o ja jembi tajungba."